

四  
明  
人  
鑑

四明張氏約園開雕

序

四明人鑑三卷始自漢初大里黃公迄明末諸忠孝節義皆四明之望人自爲傳各圖其像都一百一十二人爲二卷又錄自宋翼國夫人葉氏迄明末節女周氏都二十人爲一卷統一百三十二人節次志乘爲之傳者劉午亭也圖其像者虞譜薰也初譜薰所爲圖百六十四頁光緒壬辰影行者一百三十二頁劉氏自敘作百三十頁虞氏自敘則作百三十三頁意者當時二君或有刪去劉氏稱百三十頁者殆舉成數而言惟虞氏稱百三十三頁今猶闕一頁不知爲何時佚去壽鏞不能繪事然喜觀圖畫又嘗讀昌黎送楊少尹敘稱二疏致仕歸漢史傳其事後世工畫者又圖其迹至今照人耳目如前日事因竊以爲果得工畫者盡圖古今聖賢忠孝節烈士而人繫以小傳勒爲專書廣布於國中或散爲單頁更迭張之通衢則其觀感之效裨益風教豈淺鮮哉憶壽鏞幼時先大夫嘗以孝弟圖說詔示爲之口講指畫忽忽五十餘年今老矣猶得見此此亦孝弟圖說之亞也况所傳百三十二人中得其書刊諸四明叢

書者在漢如任奕如董黯在唐如虞世南如賀知章如

孫郇在宋如豐稷如楊簡沈煥袁燮舒璘高閌袁甫王

應麟黃震在元如程端禮在明如賀欽如張邦奇如華

夏錢肅樂張煌言今已有二十人左圖右書益動觀感

之意然則重刻此書固莫壽鏞若也聊書以冠篇端午

亭工於詩有雲閑詩草四卷錄副藏之蛟川之雋而德

行君子也是書傳而其人亦傳矣民國二十九年一月

四明人鑑 序

二 四明叢書  
約園刊本



序

四明人鑑二卷始自漢初大里黃公迄明末諸忠孝節義士皆四明之望人自爲小傳各圖其像都一百一十二人爲二卷又錄自宋冀國夫人葉氏迄明末節女周氏都二十人爲一卷統一百三十二人節次志乘爲之傳者劉崑亭也點染丹青各圖其像者虞譜琴也初譜琴所爲圖百六十四頁今存者百三十二頁劉氏自序作百三十頁虞氏自序則作百三十三頁意者當時二君或有刪去劉氏稱百三十頁者殆舉成數而言惟虞

四明人鑑序

一四明叢書

約園刊本

氏稱百三十三頁今猶闕一頁不知爲何時佚去矣余素不解繪事然喜觀圖畫又嘗讀昌黎送楊少尹序稱二疏致仕歸漢史傳其事後世工畫者又圖其迹至今照人耳目如前日事因竊以爲果得工畫者畫圖古今聖賢忠孝節烈士而人繫以小傳勒爲專書廣布於國中或散爲單頁更迭張之通衢則其觀感之效裨益風教豈淺鮮哉今二君固已先我而得此意且復起自四明余之從事刊書播布國故也亦起自四明然則余與二君可忝託同志而刊刻此書固亦莫余若也因取此

書校錄一過付之梓人至於繪像則用珂羅板景印期  
存其眞抑亦示人以觀感之意也夫是爲序民國二十  
四年一月後學張壽鏞

西明人鑑序

二四明叢書  
約圖刊本

劉午亭先生傳略

劉先生諱慈孚一名德崇號午亭鎮海崑亭人事母孝  
教子嚴與鄉里鄰郈交必以誠蓋德行君子也天資豪  
爽日以琴書圖畫蒔花飲酒自適其性尤好吟詠凡目  
之所營人事之所值風俗之所繫良朋契友之往來里  
叟野老之談論悉著之於詩自號雲閑子卽以名其詩  
有雲閑詩草四卷邑中耆舊詩拾遺若干卷又竭數年  
心力繪四明人鑑圖其見於文學者如此陳繼聰孝廉  
序先生詩稱爲超塵之外得林泉之趣吐詞多雅爲蛟

四明人鑑

傳略

一四明叢書

約園刊本

川後起之雋虞景瓚孝廉序稱劉丈僻居萬山之中佐  
以詩畫發爲詩歌意氣邁放而按之物情無不盡者王  
侍講榮商輯蛟川耆舊詩補稱先生嗜酒詩能書畫嘗  
留心鄉邦文獻此先生之見推於先達者先生生於道  
光廿二年壬寅七月廿五日丑時卒於光緒廿九年癸卯七  
月初五日午時享年六十歲元配王氏生道光十九年  
己亥三月十九日卯時生子三長和均次和壩三和坊  
女二鄉後學鄭岱雲謹識

序

四明爲人才淵藪之區周秦以上書缺有閒自漢大里黃公翊贊太子箸在史冊而姓名之相傳里居之所在紛紛籍籍已不可窮詰降及唐宋人物彪炳頗難屈指其一藝之長一節之善尤不可更僕數崑亭劉君午亭幼習舉子業長鄙棄之汜濫于唐宋詩古文不名一家自從陳孝廉駿孫遊學日進所作詩文亦駸駸入古曾編四明百卅人物傳倩虞君譜薰爲之圖豈謂吾郡人物囊括於是哉大凡人之著書各有命意或明吾心所

四明人鑑序

一

四明叢書

約圖刊本

嚮往而取古人以爲的或憫世俗之混莽而借古事以爲風百卅人物雖不足盡四明之才而劉君之取資不爲不多矣劉君所作傳不過采掇志乘事蹟而命意之所在悉寓諸圖譜薰之爲圖也多劉君授以意惜余少暇日不能作圖贊以明其取監之指然細玩其圖自知其作書之意矣若徒賞其畫法之工亦所謂皮相士也時在光緒十三年正月穀日定海黃以周

序

余作滬上客已非一日欲得一知己誠非易易余今秋  
偶遇虞君譜薰聆談片刻意氣相投虞君曰盍不過做  
寓一敘乎余曰然然便登其樓窗明几淨清曠怡情不  
覺撲去俗塵三斗於是詩酒論交談心竟夕俄見案上  
一書曰於越先賢圖余曰越人有志我豈無情吾四明  
亦當刊此名圖以匡風俗惜少有心人者虞君莞爾笑  
曰余有此圖藏之久矣恐疵累未淨不足爲大雅觀遂  
出四明人物傳圖百六十四頁曰自庚辰與劉君午亭

四明人鑑序

二四明叢書

約圖刊本

同志於茲十有三年矣余觀其描摹之畢肖點綴之錯  
落凡四明掌故顯然羅列尺幅中洵雅觀也展玩再四  
愛不釋手遂邀邱君寶麟劉君椿吳君祥麟陳君裔顏  
君蓉甫王君魯傳承諸君賞鑒莫不拍案而道羣相稱  
羨想虞劉二君十餘年之苦心宜行於世以彰厥德卽  
付梓刊聊供同好豈非大快事哉余故表而出之以記  
諸君之志云爾是爲序光緒壬辰秋仲慈北觀海衛志  
瀛吳顯廷撰象山平叔歐仁衡書

序

古人事蹟昭著于史乘者善畫家每圖以紀之然非有  
關于世道人心雖窮形盡相無益也昔蕭山任君渭長  
繪於越先賢圖取事確鑿用意古厚舉先型以示後來  
使其郡之人咸知其郡之有人其有裨於越者誠非淺  
鮮吾四明固多賢哲慈孚以訂耆舊詩拾遺之役展核  
志乘及鄉先正詩文遺事每錄一過如見其人亦思繪  
圖傳之而不工于畫有志未逮蓋數年于茲矣適胡占  
梅茂才謀作古今人鑑圖于虞君譜薰屬孚共事孚喜  
其以人為鑑與有同志願統舉古今不限以地非特別  
史志乘不勝甄錄卽二十四部與國朝掌故之書凡可  
歌可慨可慕之人不能更僕數而欲于其中擇而存之  
挂漏之譏庸能免乎故莫如就四明一郡卽孚向所志  
未逮者藉譜薰以成之耳目親切綜括匪難桑梓敬恭  
輿感尤易庶與渭長之圖彼此輝映未必無補于世道  
人心已譜薰以爲然乃過我紫荆花館相與商榷而摹  
繪之期年之閒計得圖百三十校讎既竟爰序其所以  
雖然百三十之圖亦豈足以盡吾郡之人物哉光緒丙

戊五刀鎮海崑亭山人劉慈孚書

四明入鑑序

四  
四明叢書  
續編刊本

序

蛟川之東南有崑亭焉與吾鄉六橫山祇隔一襟帶水  
山中人時相往還余友張君和伯嘗告余曰崑亭有劉  
午亭明經志行修潔不慕榮利棄舉子業肆力於詩古  
文詞其灑落多如此余心誌之願借張君爲介紹得聯  
文字交以慰一時向慕之意不幸張君遽作古人此事  
遂忽忽不果余於癸未冬需次吳門違鄉背井九載於  
茲風塵鞅掌俯仰自傷回首舊遊晨星零落如劉君者  
十餘年來未謀一面而近日之耽吟倍昔造詣加精余

四明人鑑序

五四明叢書

綸園刊本

均不得而知之也今年春西席胡頤堂廣文自鄉里來  
袖劉君近作四明人鑑圖冊索余序余乃得睹劉君之  
手筆何其幸歟四明爲人才淵藪自漢迄今其間碩德  
名流奇光亮節誠不能更僕數或見諸金石之留貽或  
得諸名山之撰著或彪炳乎正史或散見於他書雖碑  
殘簡蠹不無缺略而徵文攷獻雅賴搜羅如鄉先輩近  
時所修之四明新志闡發幽潛宣揚疇昔洵足彰前民  
之矩矱示後學之津筏矣劉君之作殆亦有見於是乎  
古來雲臺上將凌煙勛臣多以畫傳近今吳中滄浪亭



繪五百名賢像贊而泐諸石使此邦人士知所矜式四  
明人物圖此物此志也詩曰維桑與梓必恭敬止攬斯  
圖也益令人起恭敬之念於以知劉君之意亦良美矣  
雖然有其意而筆不足以達之又無以賞心而悅目斯  
圖也殆離奇變化而窮於思議者哉時或仿六朝人之  
工細時或如宋元名家專寫大意至其人物之向背隱  
見各就其本事而摹仿之或兀然而立或危然而坐或  
倚樹而沈吟或臨流而寄興或金戈鐵馬慷慨從戎或  
繡黼彤裳雍容坐鎮或遁跡於山深林密或埋身於地  
棘天荆或悲弱息之完貞孤衾啜泣或狀窮殘之苦節  
篝火淒涼衣冠巾櫛奕奕如生按圖尋索殊耐人思此  
又以見劉君之慘澹經營而虞君譜薰兼能得其意而  
揮灑之技亦神矣哉必傳何疑顧余觀斯圖又重有感  
焉自宋以理學稱者四明有袁楊沈舒四先生端憲公  
卽余之始祖也逮余身計二十四世矣余才識謏陋學  
殖荒落不克上承先業徒增媿慙近又浮沈俗吏於簿  
書之暇得披是圖而獲窺先世之儀型余小子不猶有  
深幸也歟因不禁喟然而歎曰數典無忘劉君其有以

詔余乎光緒十七年四月朔翁洲沈熙廷

四明人鑑序

七  
四明叢書  
約圖刊本

丹青引贈蛟川虞生

丹青何必無畸人於今蛟水推虞生  
白晳丰裁年少子秋水爲骨冰爲神  
天生爾有不凡手五色花粲毫端春  
挹露披霜蓄奇嗜懷珠葆玉安清貧  
恥爲健兒賞白雪獨借胡絃鳴不平  
偶乘單舸渡瀛海橐筆來叩桃花津  
主人性亦愛塗抹相得如齋春醪醇  
遐心合與白雲契欣然把臂開山扃  
抱泉別墅特幽峭松篁交擁無纖塵  
背岡面水安小築不與人世相拒迎  
是時天氣際冬暮彤雲鬱鬱山川凝  
北風迴旋催急雪平郊璨爛連空冥

四明人鑑引

一四明叢書  
約圖刊本

與我圍爐作高會螺卮引滿傾復斟  
豪情傑隨商飈舉健筆欲與瓊葩爭  
腕運秋聲掠鷹隼圖成靈石蟠蛟鯨  
一客蚪髯據平檻雙眸虎視輝明星  
披胸半褶袒朱褐橫腰三尺懸青萍  
李郎顧盼亦雋爽當墀按馬如含曠  
背人姝姝作眉語秋水翻波何盈盈  
金鐙刻鬢意閑雅玉釧約臂光晶瑩  
四圍滃染更璀璨玉樹瑤樓殷千層  
墨瀋淋漓騰咫尺意匠慘淡細經營  
奇蹤異境嗟入妙撫卷大叫能手純  
畫工如此古亦有世閒俗眼難爲青  
肯留餘技狀花鳥每逢知己亦寫真  
大逾徑丈小盈寸

濃妝淺抹皆工精誤筆有時得生意點綴不讓吳曹興  
自昔良材招眾忌莫隨凡俗邀近名嗚呼虞生太奇穎  
前年束髮猶髫齡未向天池絢丹翰暫依泉石藏青珉  
萍蹤飄合自非偶做廬小住三經旬如何歲陰駐殘臘  
欲別怱怱還酸辛贈以一截青琅玕示之我意如霜筠  
祇今不見四十日眼底落落誰知音我思虞生歌一曲  
垂楊深處啼黃鶯同治癸酉十二月象山王蔣蕙研農  
甫并書

繪事能將大雅扶雕蟲小技愧吾徒分明信是千秋鑑

四明人鑑引

二四明叢書  
約圖刊本

珍重還當座右圖壬辰秋八月慈北菁翰戎獻琛題

海上相逢少逗留讀君佳畫更低頭名邦人物分明在  
先哲音容髣髴留布置果能精入法經營今已閱三秋  
表揚桑梓傳幽隱豈與尋常冊子侔吳友如題

十載虛名擅寫真明州浪迹逐風塵輸君絕妙傳神筆  
不貌今人貌古人靜齋弟周景彝初書

慘澹經營意態真千年舊事卻翻新便看筆墨徵君秀  
也羨明州大有人弟金蟾香題

先生善畫本天成未獲傾襟耳已名忽見廬山真面目

篋中阿堵有神行

四明人物溯遺風信手描摹一卷中  
意匠經營何慘澹  
至今如見鄂襄公

虎頭三絕久稱奇繼起於今妙手追  
佳士逢時應下筆  
肯容我輩寫生姿

毫閒生動盡通神畢肖鬚眉合是真  
儻入宣和諸畫譜  
無多筆墨世希珍古董陳衍題

筆墨淋漓佈局新躍然紙上獨傳真  
四明賢哲誠堪慕  
皆作先生畫裏人谿上兪星維未是草

四明人鑑引

三四明叢書

約園刊本

士女悲歌想像留羨君妙筆擅風流  
分明於越圖猶在  
佳處還應勝一籌翁洲胡維星拜題

圖繪當年服渭長曾將筆墨闢幽光  
家鄉韻事今誰繼  
何幸君能得辨香蛟川李光榮奉題

題辭

崑亭山人鬱懷抱豪情勃發天地小一盃在手眼無人  
著眼乃在人中表吾郡夙號文物邦漢有黃公尊四皓  
魏晉以後代有人宋元迄今更不少生前卓越死留名  
往事昭垂今立標不於水鑑於人鑑惜哉難爲流俗道  
山人歎以人治人用心良苦意則巧上自史乘下雜說  
旁及詩歌咸搜討蒼萃千載成一編闡發幽滯星日皎  
百三十人精益精開卷令人心了了繫之以傳象以圖  
風雨三年始脫橐顏曰人鑑出示我我讀其書拜欲倒

西明人鑑 題辭

一 西明叢書

約園刊本

維桑與梓必恭敬凡有知識宜所曉何況羅列在目前  
展卷那不睨子瞭初觀猶以畫圖看入勝恍遊仙佛島  
尋思再三肅然起竊歎此書真至寶吁嗟柳下無人伯  
夷死廉立敦寬風已眇因果之書迂且腐誨者諄諄聽  
藐藐礪世磨鈍得是編照見肺腑深而宵天良激發妙  
自然豈徒供人眼福飽嗟我飢驅事奔走每歎勞人空  
草草邇來彷彿水中鳧自問何以浮沈老藉君爲我燭  
妍媸轉惜君書成不早成之剗剗急惠我好把腐儒塵  
俗掃光緒辛卯五月頤堂弟胡昌年

陳章侯寫人物爲古今冠筆勁氣清神情活現真神品也學章侯者莫如任君渭長渭長有於越先賢圖之作至今風行中外咸以爲章侯復生不意又有虞君譜薰出復作明州人物圖藉繪事之流傳表鄉里之舊德百三十頁頁頁落筆清勁深得章侯之法細細觀之不勝欽服爰誌數語聊記眼福時乙酉秋七月下浣鴛湖八十三老人子祥張熊

一覽能令眼界開卻將舊蹟作新裁試看筆墨安排定何處閒行著點埃辛卯春暮慈北子封陳祥燕題

四明人鑑

題辭

二四明樓書

約園刊本

古蹟紛繁記不清事關鄉國易移情明州掌故資稽考畫史頭銜孰與爭壬辰秋仲慈北吳顯廷題并書

吾郡多賢皎若星日欲瞻儀容能無缺失乃生畸人窮研縷述潛德幽光必表而出惟其傳之既文且質惟其圖之又疏且密遷固之史荆關之筆會萃成書心手如一丙戌五月樸莊張廷盂

四明人鑑目錄

卷一

漢

大里黃公

御史中丞任公奕

主簿梁公宏

主簿任公光

純德徵君董孝子黯

唐

永興縣子銀青光祿大夫文懿虞公世南

和州刺史孝子張公無擇

祕書監禮部尙書賀公知章

孝子劉公通

左拾遺孫公郃

尙書樂公仁規仁厚

明州刺史上柱國江夏縣開國子黃公晟

宋

和靖處士林先生逋



馮先生制

杜先生醇

天章閣待制知桂州沈公起

知縣王公文亮

沃先生元瑀

樞密直學士清敏豐公稷

左正言贈中大夫文介陳公禾

觀文殿大學士文莊汪公洙

博學宏詞王公璧

四明人鑑

目錄

一

四明叢書

約園刊本

建寧府通判中奉大夫曹公粹中

修武郎任公馘

楊孝子慶

太師忠定史越王浩

敷文閣待制莊靖汪公大猷

華文閣直學士文懿陳公居仁

資政殿大學士少師宣獻樓公鑰

張孝子超

寶謨閣學士文元楊公簡

贈直華文閣學士端憲沈公煥  
禮部侍郎兼侍讀正獻袁公燮

宜州通判文靖舒公璘

吏部豐公有俊

賜進士憲敏高先生閣

進士趙先生敦臨

少傅兵部尙書正肅袁公甫

吏部侍郎陳公垣

貴溪令趙公彥彬

四明人鑑

目錄

三四

明叢書

約圖刊本

楚州錄事參軍旌忠曹公孝先

禮部尙書鄞縣開國伯王公應麟

大中大夫直祕閣學士張公卽之

進士劉公南強

浙東提舉文潔先生黃公震

刑部員外郎劉公揚祖

樊城守張公漢英

純德先生陳公應麟

卷二

元

鉛山州學教授程公端禮

夏孝子永慶

陳孝子汝楫

華孝子昭

侍講學士文清袁公桷

知縣薛公觀

菊村先生袁公士元

翰林學士陳公樞

四明人鑑 目錄

四明叢書

約略刊本

贈奉訓大夫禮部郎中象山縣男俞公述祖

明

按察副使汪公繪世

刑部尚書錢公唐

太學上舍陳先生思禮

復翁王先生國祚

翰林院侍講張公信

錢倉所千戶易公紹宗

正千戶陳公睦

工部郎張公安國

刑部郎中梁公田玉

兵部郎中李公山如

楊先生範

寧波衛指揮將軍萬公文

兵部右侍郎宋公琰

大理寺卿蔡公錫

王先生汝林

刑部主事晉承德郎張公璿

蜀人鑑

目錄

五

四明叢書  
約圖刊本

俞孝子敏德

夏孝子道昌

南車駕員外郎嚴公端

御史知府沃公頰

戶科給事中恭定賀公欽

左都御史太子太保姚公鏞

兵部尙書文定張公邦奇

翰林院編修介塘王先生相

總督劉公鼎

魚臺縣令史公元中

兵部右侍郎范公欽

許孝子瓏

工部主事戴公鰲

按察副使葉公應乾

都指揮僉事劉公隆

贈光祿寺署丞杜公槐

義士楊一

沈孝子良十

四明人鑑

目錄

六

四明叢書  
約圖刊本

義士魏鏡

義士胡滾

壯士吳德四德六

定海衛軍士葉七

王孝子伯化

千夫長蔡公啓元

辰州太守屠公本峻

大學士文敏余公有丁

駱先生元

禮部郎中屠公隆

靖州守備李公瓌

兵部尚書太子太保恭敏辭公三才

禮部尚書太子太保文介辭公三省

總兵官戴公國柱

陸先生大漳

婁先生文煥

翰林院檢討華公夏

大學士吏部尚書忠介錢公肅樂

四明人鑑 目錄

七 四明叢書

約園刊本

大學士兵部尚書忠烈張公煌言

周先生西

項先生宣

卷三

列女

宋

冀國夫人葉氏

孝女童氏八娜

元

節女劉氏

貞女金氏

程氏二節

明

葛氏義姑

貞女楊氏

節女張氏

節感孺人周氏

節女胡氏

四明人鑑  
目錄

八

四明叢書  
約園刊本

節女楊氏

節女潘氏

節女林氏

節女倪氏

節女胡氏

節女王氏

貞女戴氏

貞女王氏

節女方氏

節女周氏

四明人鑑 目錄

九 四明叢書  
約圖刊本



大里黃公鄞人秦博士遭時坑廢儒術因與諸博士東  
園公綺里季夏用里先生避世隱於商山而作歌謂之  
採芝詩漢高祖高此四人而不能致後欲廢太子留侯  
張良爲呂后畫策奉太子書卑辭厚禮迎此四人會燕  
置酒太子侍四人從年皆八十餘鬚眉皓白時稱四皓  
上乃大驚曰吾求公數歲公逃避我今公乃自從吾兒  
遊乎煩公幸卒調護太子卒得不廢事詳留侯世家鄞  
志黃公林漢四皓之黃公隱處卽古之大里也俗譌爲  
黃姑林今墓在大隱山載甬上耆舊傳

任公諱奕句章人爲御史中丞山陰朱育曰文章之士  
立言粲盛所馳文檄華若春榮載會稽典錄有任子十  
卷略曰一人之智不如眾人之愚一目之察不如眾目  
之明又曰水可乾而不可奪溼火可滅而不可奪熱金  
可柔而不可奪重石可破而不可奪堅又曰天之圓也  
不中規地之方也不中矩日月爲天下眼目人不知德  
山川爲天下衣食人不知謝皆摯語也載王阮昌國志

梁公諱宏少隱海隅有盛名吳郡太守尹興辟爲主簿  
楚王英謀逆陰疏天下善士及事覺顯宗得其錄有尹  
興名乃徵詣廷尉獄公與門下掾陸續功曹史駟勳及  
掾史五百餘人詣洛陽就考諸吏不堪痛楚死者大半  
惟公與續勳拷掠肌肉消爛終無異辭後得釋放歸田  
里載兩浙名賢錄

四明人鑑 卷一

四明叢書

約園刊本

任公諱光字景昇鄞人爲主簿時海賊作孽令朱嘉將  
吏人出戰爲賊所射傷賊突嘉前公以身障蔽力戰死  
嘉獲免還邑出俸厚葬之載寶慶四明志

董孝子諱黯字叔達句章人仲舒六世孫事母黃氏惟  
謹母恙思大隱溪水孝子築室溪濱就養疾瘳歸後刷  
土埒居傍進以奉母泉味如大隱鄰王寄母謂母曰我  
瘠汝肥何也曰吾雖貧黯孝心常泰而健耳王母歸以  
喻其子而寄遂毆董母母卒終喪手刃寄首祭於母墓  
自囚以告有司事聞和帝嘉其異行召拜諫議大夫累  
徵不就年八十終敕封孝子立祠贈母賢淑夫人由是  
以慈名溪以溪署縣云載純德錄

虞公諱世南字伯施餘姚人沈靜寡欲精思讀書至累旬不盥櫛文章婉縟見稱於僕射徐陵由是有名在隋官祕書郎十年不徙入唐爲秦府記室參軍遷太子中書舍人太宗踐祚歷宏文館學士祕書監封永興縣子致仕銀青光祿大夫卒諡文懿後帝爲詩一篇述古興亡旣而歎曰鍾子期死伯牙不復鼓琴朕此詩將何示耶敕於靈座焚之後數歲夢進讜言若平生翌日下制厚恤其家墓在鎮海靈緒鄉澥浦鎮載一統志及唐書原傳參浙江省志寧波府志鎮海縣志

張公諱無擇字君選慈溪人永隆初由進士舉明經刺  
史和州丁父敘憂奉喪歸里三年不櫛七日絕漿都督  
竇懷正聞於朝屬神龍初國家多事未遂旌表服禫辭  
祿廬墓以壽終宋嘉定十四年邑令趙崇附祠於董孝  
子廟之東焉

載成化四明志

唐神龍中有張孝子無擇父墓在

慈溪之虎脾山結廬負土有湧泉芝草之異仕至和州

刺史

見樓鑰董孝子廟記

賀公諱知章字季真生於鄞縣小溪之響巖唐證聖初  
進士超羣拔類科初授國子四門博士歷遷禮部侍郎  
兼集賢院學士一日併謝之又充皇太子侍讀晉授祕  
書監性放曠善談笑自號四明狂客每醉輒屬詞筆不  
加點斐然可觀天寶三載因病疏請爲道士放還鄉里  
築室四明之鹿亭樊榭時往來稽山卒年八十六葬於  
會稽肅宗詔贈禮部尚書載甬上耆舊傳



劉公諱通幼時不修細節繼母告其父父怒以杖擊之折其指殞於地越時乃甦退而自艾略無怨語人謂之曰小箠則受大箠則走禮也子委身以承暴怒所謂陷親於不義亦未得爲孝也公曰見怒而避責是重吾父之怒也某固不能迎意而承歡豈計其箠之大小而後慮其孝與不孝乎載崑亭劉氏家乘

四明人鑑 卷一

十四明叢書  
約園刊本

孫公諱邵字希韓奉化人幼負氣岸乾寧中舉進士天  
佑閒官左拾遺朱全忠篡唐公著春秋無賢人論卽脫  
冠裳服布衣養晦林泉著書紀年悉用甲子以示不臣  
之義載十國春秋參府志

樂公諱仁規光化三年授兵部尙書其制曰爾光祿大  
夫兵部尙書樂仁規粵自早歲有志事功自北而南在  
朕左右及其給事內廷論思獻替之益亦時有焉夏官  
之選惟爾之能爾尙一乃心力以報朕所以見知之意  
弟諱仁厚授刑部尙書其敕曰鎮東節度使左押衙充  
明州都押衙銀青光祿大夫檢校兵部尙書兼御史大  
夫上柱國持節辦州軍事樂仁厚居總大藩之萬里山  
揚阜俗之雙旌嘉爾勳忠列於奏薦兄弟俱以立朝正  
直取忌當時朱溫亂棄官歸隱於慈溪之大隱山

載鎮海志

黃公諱晟字明遠鄞縣人始應募於望海鎮不中選乃  
隸鎮都虞侯林膺還本鄉募眾據平嘉埭權知州事楊  
僕召署爲平嘉浦將初劉漢宏以台州賊婁文知明州  
事文爲僕所敗其黨杜宗自寧海鎮率鄉民據奉化公  
自平嘉埭以所部兵擊之執宗不殺使還台州獲其粟  
悉屬於本道遂擢爲奉化郡防遏使兼佞飛都副兵馬  
使餘姚鎮將相嘉侵越州董昌禦之不利刺史鍾季文  
遣公領兵攻嘉擒殺之又擢爲浙東道東面副都指揮  
使本州刺史及董昌僭竊錢鏐舉師公帥眾夾攻遂斬

昌封上柱國江夏縣開國子在任十八年卒遺疏不請  
其子爲嗣凡府庫所蓄必題曰送使其忠順如此哉吳  
越備史十國春秋

林先生諱通字君復奉化黃賢村人隱於錢塘之孤山  
咸平中徵召不起賜號和靖處士事詳宋史有將歸四  
明夜坐話別任君詩曰酒酣相向坐別淚溼吟衣半夜  
月欲落千山人憶歸亂塵終古在長瀑倚空飛今日重  
攜手前期易得違載雍正寧波府志

馮先生諱制字公初慈溪人康定閒大饑民至相啖食  
家有穀數千斛悉貸之賴以全者百餘家舍東有古坡  
縣長牟經俾鄉先生王致楊適耕之民數奪其澗水先  
生諭民穿古渠引潮以溉無復奪水之擾二先生割田  
爲壽先生曰吾哀先生窮耳豈望報耶踰錢塘會故知  
錢寺丞負客債數百緡索之急悉與償之居常聚族子  
弟誨之使學務中規矩未幾弟準子碩姪景相繼第進  
士躋顯官載成化四明郡志

杜先生諱醇居慈溪孝友稱於鄉里耕桑釣牧以養其親明經行修學者以爲楷模慶中鄞始建學縣令王安石請爲師先生辭以再強起之始就焉慈溪令林肇立學又起爲師二邑文風之盛自先生始王安石慈溪縣學記起先生杜君醇爲之師而興於學杜君者越之隱君子其學行宜爲人師者也載延佑四明志



沈公諱起字興宗鄞人進士高第調滁州判官遷知海門縣縣負海地卑歲海潮至冒民田舍公爲築隄百里引江水灌溉其中田益闢御史中丞包拯舉爲監察御史乞復府兵汰冗卒通判越州改知蘄楚二州京東歲饑盜起除提點刑獄至則開首贖法攜其伍盜內自睽疑轉相束縛惟恐後改開封府判官爲湖南轉運使召爲三司鹽鐵副使直舍人院熙寧三年韓絳使陝西加公集賢殿修撰陝西都轉運使慶州軍變將寇長安公率兵討平之會絳城綏州不利公亦罷入知吏部流內

餘奉使契丹至王庭其位著乃與夏使等公曰彼陪臣  
爾不當與王人齒辭不就列遂升東朝使者自是爲定  
制六年拜天章閣待制知桂州公生平喜談兵嘗以兵  
法謁范仲淹器其材注孫武書以自見事詳宋史

王公諱文亮字昭遠嘗渡浙江於舟中見遺金百兩留  
三日待其人至歸之而去不告以名仕至龍川令載奉  
化縣志

甯人鑑 卷一

二十四明叢書

約圖刊本

沃先生諱元瑀字君寶熙寧八年歲穀不登疫癘大作  
先生躬行郊野掩覆骸骨日散庾積以應貸者及秋亦  
不責償悉焚其券載舊定海志

豐公諱稷字相之鄞人登第知封邱縣召對擢監察御史章惇請託事無所移撓遷右司諫元祐閒以集賢院出知潁州江寧府徽宗立召除御史中丞公盡言守正帝將處之尙書左丞而忤貴近不得留竟以樞密直學士守越蔡京得政修故怨貶海州團練副使安置台州除名徙建州稍復朝請郎卒建炎中追復學士謚清敏徽宗時宦官漸盛公懷唐書仇士良傳讀於帝前讀數條帝曰已諭公爲若不聞者讀畢乃止凡三任言責每草疏必密室子弟亦不得見退多焚稿未嘗以時政語

人載宋史

四明人鑑 卷一

三

四明叢書  
約園刊本

陳公諱禾字秀實鄞人舉元符三年進士擢監察御史  
劾蔡京子儵何執中壻蔡芝之罪皆罷之遷辟雍博士  
入對契旨遷右正言時童貫與黃經臣表裏爲奸公抗  
疏首劾貫後劾經臣怙寵弄權誇衒朝列每云詔令皆  
出其手言上將用某人舉某事已而詔下悉如其言夫  
發號施令國之重事黜陟幽明天子大權奈何使宦寺  
得與此塗一開國家之禍有不可遏願亟竄之遠方論  
奏未終上拂衣起公引上衣請畢其說衣裾落上曰正  
言碎朕衣矣公曰陛下不惜碎衣臣豈惜碎首以報陛

下此曹今日受富貴之利陛下他日受危亡之禍言愈切上變色曰卿能如此朕復何憂內侍請上易衣上卻之曰留以旌直臣卒贈中大夫諡文介載宋史



汪公諱洙字德溫自幼善賦詩有神童之號九歲牧鵝見鬢宮頽圯題其壁曰顏回夜觀星象夫子朝朝雨打頭世代公卿從此出何人肯把俸錢修上官竒而召見晚授明州助教歷官至觀文殿大學士卒諡文莊著有春秋訓詁載甬上耆舊傳參兩浙名賢錄

王公諱璧字子潤鄞人成宣和六年進士少年氣銳以  
遠大自期悉焚前所爲舉子文披閱羣書醞蓄日富舉  
筆爲文波瀾洶湧朝廷方復博學宏詞科首魁其選未  
幾卒士論惜之載嘉靖寧波府志

曹公諱粹中字純老父實贈奉職郎從父貫崇寧五年  
進士官御史中丞公學問以躬行實用爲先李光聞其  
賢妻以長女翁壻閒自爲知已有冰玉之譽宣和六年  
公登進士第待次無爲校官時秦檜在相李光爲參政  
檜知公名欲識之辭曰吾已有差遣見丞相何爲退語  
其妻曰吾觀爾父與秉衡者勢不兩立豈久居此者光  
卒貶海南公不復仕自號放齋以著書爲樂後檜死張  
浚力薦於朝以朝散郎通判建寧府乾道三年致仕累  
贈中奉大夫載攻媿集寶慶志延佑志

任公諱戩字彥遠奉化人少英敏多勇略每慕張子房  
諸葛孔明之爲人嘗歎曰二賢若在吾願爲之執鞭與  
同邑李侑董之邵以慷慨好義稱建炎三年金人入明  
州大掠諸縣公與侑之邵奮義鼓勇共率家丁數百人  
禦於泉口每乘閒出奇以擣金金不敢犯奉化得全官  
修武郎載兩浙名賢錄

楊孝子諱慶鄞人父病貧不能召醫迺割股肉啖之良  
已後母病不能食孝子取右乳焚之以灰和藥進焉入  
口遂差久之乳復生紹興十三年詔表其門載宋史

史王諱浩字直翁鄞人紹興十四年進士除校書郎歷起居郎兼太子右庶子孝宗受禪以中書舍人遷翰林學士除參知政事有詔議應敵定論疏奏先爲備禦是爲良規儻聽淺謀之士興不教之師寇去則論賞以邀功寇至則斂兵以避跡謂之恢復得乎隆興元年拜尙書右僕射首言趙鼎李光之無罪岳飛之久冤宜復其官爵祿其子孫悉從之張浚請幸建康因陳三說不可退詰浚曰帝王之兵當出萬全豈可嘗試以圖僥倖御史王十朋論之遂與祠尋復爲右丞相將告歸薦江浙

之士十五人如薛叔似楊簡陸九淵石宗昭陳謙葉適  
袁燮趙靜之張子智後皆擢用除太保致仕封魏國公  
光宗御極進太師紹熙五年薨諡文惠嘉定十四年追  
封越王改諡忠定載宋史

汪公諱大猷字仲嘉鄞人紹興十五年進士授金華丞  
歷遷大宗丞兼吏部郎入對言總覈名實責任臣下量  
能授官毋拘流品孝宗顧謂左右曰疏通詳雅有用之  
才也遷祕書少監兼權刑部侍郎孝宗每訪政事公遂  
陳亭戶未嘗煮鹽居近場監貸錢射利隱寄田產害及  
編民宜取一等等以上充役又論賜田勳戚豪奪相先陵  
轍州縣惟當賜金使自求又論沒入貲產止可行於強  
盜賊吏至於倉庫綱運之負陷者惟當卽其業收租以  
償既足則給還使復故業轉對言權酒之害及居官者



不得鑄銅爲器上嘉獎之改權吏部侍郎兼權尙書以  
言去授敷文閣待制歿贈二官公與史浩同里又同年  
進士未嘗附麗以干進浩深歎美之載宋史本傳

四明人鑑卷一

三三  
四明叢書  
一約園刊本

陳公諱居仁字安行興化軍人父太府少卿膏娶明州汪氏女因家焉僧王法恩謀逆事覺或請屠城膏方爲御史力論多殺非聖事脅從者悉寬宥之公舉紹興二十一年進士調永豐令淮甸交兵魏杞以宗正少卿使金辟公幕下時和戰未決金兵駐淮北人情洶懼突騎大至彎弓夾道公上馬從容舉酒屬杞觀者壯之乃諭金人開道入卒成禮減歲幣而還轉承議郎進祕書丞權禮部郎請外知徽州至郡招三衙軍植二表於庭有輸納中度而遭抑退者抱所輸立表下親視之人無留

滯吏不能措手輸稅者恆裹贏以歸鄰州有訟多詣臺省乞決於公秩滿入對請編類隆興以來寬恤詔令有曰法久則易玩事久則易怠惟申加戒飭以警其觀聽則千萬年猶一日帝曰名言也尋遷起居郎兼權中書舍人泛恩濫賞封繳無所避請盡放天下五等戶身下四等戶一半從之安定王子彤乞封妾爲夫人公繳奏帝喜謂有補風教以集英殿修撰知鄂州移建寧府鎮江大旱又移守鎮江加寶文閣待制知福州再進華文閣直學士卒載宋史

樓公諱鑰字大防隆興初進士光宗嗣位擢起居郎兼中書舍人公立螭頭登右掖繳奏無迴避禁中或有私請上曰樓舍人朕亦憚之不如且已光宗病不能持喪傳位太子公草詔有曰雖喪紀自行於宮中然禮文難示於天下人服其婉寧宗時韓侂胄用事公告老家居杜門著書侂胄與客言樓大防善士曾無一札入都門且使諭意客至公家述其語公默然子弟相顧具紙筆公取顏氏家訓言士大夫晚節名節事置紙上客大愧不敢言公亦不復問其從容持正若此除資政殿大學

士卒贈少師諡宣獻廟所居曰攻媿齋自稱攻媿主人  
有文集一百二十卷行世載甬上耆舊傳

四明入鑑 卷一

三  
四明叢書  
約圖刊本

張孝子諱超昌國縣人年十九父縈患氣疾寢篤懇禱無效孝子乃剖脅取肝煮粥以進不踰日父病愈乾道二年十二月守趙伯圭舉楊慶例命縣厚加優卹嘉泰四年台葛洪與免徭役仍封植其父母墓禁樵採載延佑四明志

楊公諱簡字敬仲慈谿人乾道五年進士授富陽主簿  
會陸九淵道過富陽問答有契遂定師弟子禮爲紹興  
府司理犴獄必親臨端默以聽使自吐露常平使者朱  
熹薦之差浙西撫幹出諸葛亮正兵法肄習之軍政大  
修丁外艱服除知樂平縣興學訓士諸生聞其言有泣  
下者夜無盜禁路不拾遺紹熙五年召爲國子博士會  
斥丞相趙汝愚公上書言汝愚忠亦遭斥寧宗更化遷  
著作郎兼權兵部郎官極言弭災消禍之道授著作郎  
將作少監入對答問往復漏過八刻上目送久之以面

對所陳未行求外補知溫州在郡廉儉自將民愛之如  
父母咸畫像事之遷駕部員外郎授朝議大夫理宗卽  
位賜金帶寶慶元年轉朝議大夫慈谿縣男尋授華文  
閣直學士提舉佑神觀奉朝請詔入見公屢辭授敷文  
閣直學士累加大中大夫乃提舉鴻慶宮尋以寶謨閣  
直學士大中大夫致仕卒贈正奉大夫所著有甲槩乙  
槩冠記昏記喪禮家記家祭記釋菜禮記石魚家記又  
有己易啓閉等書後制置使劉黻卽其居作慈湖書院  
詳載宋史



沈公諱煥字叔晦定海人試入太學與臨川陸九齡爲友從而學焉乾道五年舉進士授揚州教授召爲太學錄以所躬行者淑諸人早暮延見學者同僚忌其立異請黜之調高郵軍教授後充幹辦浙東安撫司公事歲旱常平使分擇官屬賑恤得餘姚上虞二縣無復流殍改知婺源三省類薦以聞遂通判舒州閒居雖病猶不廢讀書拳拳以母老爲念善類凋零爲憂周必大曰益者三友叔晦不愧焉公人品高明中有未安不苟自恕常曰晝觀諸妻子夜小諸夢寐二者無愧始可以言學

追贈直華文閣謚端憲載宋史 言行編公爲學錄常  
正衣冠同僚私謂曰沈君莊肅如是我輩亦當如是盛  
暑時亦然

四明人鑑 卷

四明叢書  
約圖刊本

袁公諱燮字和叔鄞人生而端粹專靜乳媪置槃水其  
前玩視終日夜臥常醒然入太學登進士第調江陰尉  
浙西大饑公命每保畫一圖田疇山水道路悉載之居  
民名數治業悉書之台保爲都合都爲鄉合鄉爲縣征  
法爭訟追胥披圖可立決以此爲荒政首寧宗卽位以  
太學正召時朱熹諸儒相次去國公亦以論去嘉定初  
召主宗正簿樞密院編脩知江州改提舉江西常平召  
爲都官郎官遷司封對言陛下已深知彭龜年之忠一  
龜年雖歿眾龜年繼進天下何憂不治遷國子司業進

祭酒延見諸生必迪以反躬切己忠信篤實是爲道本  
聞者悚然有得除禮部侍郎兼侍讀時史彌遠主和公  
爭益力臺論劾罷之起知溫州進直學士奉祠卒公初  
入太學陸九齡爲學錄同里沈煥楊簡舒璘皆在學以  
道義相切磨後見九齡之弟九淵乃師事焉每言人心  
與天地一本精思以得之兢業以守之則與天地相似  
學者稱曰絜齋先生諡正獻載宋史

舒公諱璘字元質一字元賓奉化人入太學張栻官中  
都公往從之又從陸九淵朱熹呂祖謙學以書告其家  
曰敝牀疏席總是佳趣櫛風沐雨反爲美境舉乾道八  
年進士爲徽州教授徽習頓異詩禮久不預貢士學幾  
無傳公作詩禮講解家傳人習自是其學寔盛丞相留  
正稱公爲當今第一教官司業汪遠薦知平陽縣郡政  
頗苛公以民病告辭嚴義正守爲改容秩滿通判宜州  
卒公嘗曰師道尊嚴璘不如叔晦若啓迪後進則璘不  
敢多遜袁燮謂公篤實不欺無一毫矯偽楊簡謂公孝

友忠實道心融明謚文靖載宋史

四明人鑑卷一

四明叢書  
約園刊本

豐公諱有俊字宅之四明人過倡樓見一妓疑是故人  
女累目之妓亦省酒罷留宿詰之果然公曰某所以留  
者以坐閒不敢問也且各就寢必有以處汝公與京尹  
有契明日以白尹且云某僅有錢百千從公更貸二百  
千嫁之尹嘉其誼卽取入府厚奩具擇良士嫁焉尹卽  
王宣子佐也公以進士歷官吏部郎中載行營雜錄

高先生諱閔字抑崇號息齋八歲誦經史通其義弱冠入太學楊時爲祭酒授以伊洛之學胡安國至京師訪士於時以先生爲首稱建炎二年陞補上舍紹興改元賜進士第先生少宗程頤學自王安石廢春秋先生獨耽玩遺經專以程氏爲本爲之集注四明學派導源慶曆諸公至於伊洛世系則自先生始諡憲敏載鄞縣志



趙先生諱敦臨字芑民少入太學與高閎見楊時於京師得其指授洛學之來甬上自先生始自是四方名士翕然嚮慕魏杞汪大猷童文定其門人也登紹興五年進士王應麟葺其遺文爲之序曰斯文也黃收純衣之製太羹元酒之味也昔者子朱子謂前輩爲文明白磊落切指事情無睚眦側媚之態愚於芑民見之載鄞縣志

袁公諱甫字廣微鎮海縣人從楊慈湖簡受業慨然以斯道自任登嘉定七年進士第一每自言能爲劇縣令人問曰欲宰縣不欲爲臺閣何也公曰人各有能有不能譬繒中之錦錦不可以爲帽穀中之稻稻不可以爲蓋是以聖人使人必先以器人善其言除松滋令大有治行民甚德之入爲校書郎通判湖州守衛饒二州提點江東刑獄爲外官者十五年一以傳心爲本於貴溪朶象山書院廬阜輿白鹿洞書院又建番江書堂嘉熙元年遷吏部侍郎尋擢兵部尙書兼吏部尙書卒贈通

議大夫諡正肅詳載鎮海縣志

四明人鑑卷一

至四明叢書  
約圖刊本

陳公諱墳字和仲鄞人試江東轉運及禮部皆第一嘉  
定十年進士理宗卽位詔求言公上封事直聲著天下  
遷太常博士獨爲袁燮議諡餘皆闕筆賈貴妃入內公  
言乞取君側之蠱媚史彌遠召問曰吾甥殆好名耶公  
曰求士於三代之下惟恐其不好名彌遠卒召爲樞密  
院編修官首言天下安危在宰相秦檜死所任不過萬  
俟卨沈該侂胄死所任不過史彌遠此今日所當謹也  
次言內廷當嚴宦官之禁外廷當嚴臺諫之選歷官吏  
部侍郎授國子司業諸生相慶以爲得師載宋史本傳

趙公諱彥彬四明人嘉定間爲貴溪令廉以律己嚴以御吏寬以恤民其座右書曰俸薄儉常足官卑清自尊及代去百姓遮道攀轅請留涕泣送之載江西志前此宰貴溪者無廉吏諺語云飲卻三山堂下水縱非汙者也成汙公曰自愛檻前山有意誰云堂下水汙人見廣信府志

曹公諱孝先字元思奉化人寶慶中任楚州錄事參軍  
李全謀叛遣劉福慶脅犯制置許國公趨入諭之曰制  
置朝廷大臣犯制置是犯朝廷也語旣爲亂軍所射中  
喉拔箭叱曰誤李全斬東市非汝曹而誰曹孝先決不  
求生許制置決不可殺賊鎧鏃交集血流被體猶登城  
與國謀所以討賊者血盡氣微國枕之以磚遂絕事聞  
詔賜廟額曰旌忠官其子載寶慶四明志

王公諱應麟字伯厚慶元府人九歲通六經既舉進士  
從王桎學嘗自言曰今之事舉子業者沽名譽得則一  
切委棄制度典故漫不省非國家所望於通儒於是閉  
門發憤誓以博學宏辭科自見假館閣書讀之寶祐四  
年中是科遷國子錄進武學博士丁大全欲致公不可  
得遷太常寺主簿面對邊事忤大全意遂罷大全敗起  
擢祕書郎彗星見應詔極論執政侍從臺諫之罪度宗  
卽位授禮部郎官遷祕書少監兼侍講忤賈似道意又  
出主管崇禧館久之又起知徽州其父攜嘗守是郡父

老皆曰此清白太守子也摧豪右省租賦民大悅召兼  
侍講遷起居郎兼權吏部侍郎指陳成敗順逆之說又  
忤似道及似道潰師江上授中書舍人兼直學士院疏  
陳十事進禮部侍郎日食應詔論答天戒五事陳備禦  
十事皆未及用尋轉尙書兼給事中左丞相留夢炎用  
徐囊爲御史公奏囊與夢炎同鄉引以自助善類爲所  
搏噬疏再上不報出關俟命再奏又不報遂東歸自號  
深寧老人後二十年卒所著書有深寧集等數十種載  
宋史本傳



張公諱卽之字溫夫慶元六年以父恩授承務郎兩浙  
轉運司進士歷官大中大夫直祕閣學士封歷陽縣開  
國子敷歷中外政績懋著寶祐四年制置使余晦入蜀  
誣劾閬州守王惟忠潛通北國惟忠棄市公聞之卹其  
家屬使從孫士倩娶惟忠孤女後惟忠得以禮改葬致  
仕里居三十年自號榜寮道人卹貧拯急見義必爲士  
大夫皆以爲標準公善書師歐陽率更世傳其書能辟  
火災片縑隻字皆購藏之不曾拱壁云載鄞縣志參霞  
浦張氏譜傳

劉公諱南強一名南常鄞之茅山人登寶祐四年文天祥榜進士宋末不仕遯跡山海閒課子啓一啓二耕讀以終老載鎮海崑亭劉氏家乘參府志

黃公諱震字東發慈谿人寶祐四年登進士第調吳縣尉攝長沙華亭皆有聲擢史館檢閱與修兩朝實錄輪對言當時大弊曰民窮曰兵弱曰財匱曰士大夫無恥乞罷給度僧道牒收其田人可以富軍國紓民力時宮中建內道場故首及此帝怒批降三秩用諫官言得寢出通判廣德軍初孝宗殞朱熹社倉法於天下而廣德則官置此倉民困於納息至自經公爲別買田六百畝以其租代社倉息約非凶年不貸而貸者不取息郡守賈蕃世驕縱不法公數與爭論蕃世積不堪疏公撓政

坐解官撫州饑起公知其州至則大書閉糶者籍強糴者斬於市不抑米價價日損親煮粥食餓者請於朝給爵賞旌勞者其他善政不勝述改提點刑獄決滯獄清民訟赫然如神明移浙東提舉常平進左侍郎官及宗正少卿皆不拜公嘗告人曰非聖人之書不可觀無益之詩文不作可也著日鈔百卷卒門人私謚曰文潔先生載宋史本傳

四明人錄 卷一

空 四明叢書

約圖刊本

劉公諱揚祖字宏宗慈谿人景定三年進士爲刑部員外郎見賈似道執政國事日蹙遂有隱志逾年宋亡改冠裳慟哭及元下詔求賢先生不忍聞遂徙家雲湖山寺之東自號介白散人終身不屈載續文獻通考

張公諱漢英奉化人幼聘呂氏女後女雙瞽請辭公曰  
聘時無恙而今喪明命也卒娶之咸淳間敕守樊城爲  
元阿尤所圍募善泅者置蠟書於髻中潛積草下浮水  
而出往荆郢求援至隘口被獲於是荆郢之路絕出銳  
師薄樊城公死焉載兩浙名賢錄

陳先生諱應麟字天祺鄞人淹貫經史至於曆數之學無不究其指歸人稱通儒一日乘馬出有失馬者亟前認馬先生問曰子亡馬幾何時對曰逾日矣先生有馬數年遂與之挽轡而去明日馬從別得乃詣先生叩頭謝庭下至元閒朝廷以安車召賢良先生固辭不起賜號純德先生趙文敏嘗爲逸民詩以美之載成化四明郡志

程公諱端禮字敬叔學宗朱子務適於用初文宗在潛  
邸遣近侍子弟來學禮遇甚至累考授鉛山州學教授  
鵝湖書院旁有道院一日見驢跑地驅而復來默卜而  
發之得十餘石碣刻羣賢像因立堂祀之載成化四明  
志



夏孝子諱永慶字章甫定海人父文德大德中轉粟以  
供京師浮海而北舟至海津鎮溺焉孝子倉皇號救躍  
入洪波載其父以出父得不死孝子以力竭沈水舟人  
求之弗獲人皆驚歎稱曰夏孝子厥後三弟痛其兄之  
死孝也益以孝義維其家居同室食同爨有司上於朝  
旌其門曰孝義之門載戴良夏孝子詩序

陳孝子諱汝楫字傳巖象山人親歿未葬鄰家失火將  
及與妻徐氏伏柩號慟誓不獨存旣而風返火熄柩獲  
全人皆謂孝感弟汝舟疾且死以幼子爲託泣曰而子  
卽吾子忍異視邪汝舟死育其子長爲娶婦以其遺物  
畀之載嘉靖寧波府志

華孝子諱昭鄞人生未晬父亡母沈氏家貧不能自存  
外家欲奪其志誓死弗許勤紡績以教育其子後病亟  
孝子尙幼剖左股和藥以進母愈至正十年尹許廣大  
書節孝字以表其閭載嘉靖寧波府志

袁公諱桷字伯長鄞人舉茂才異等大德初爲翰林國  
史院檢閱官時初建南郊公進十議禮官推其博多採  
用之陞應奉翰林文字同知制誥兼國史編修官請購  
求宋遼金三史遺書累官翰林直學士知制誥同修國  
史至治元年遷侍講學士泰定初辭歸公在詞林朝廷  
制策勳臣碑銘多出其手所著有春秋說易說載元史  
參清容居士集

薛公諱觀字景荀一字處靜鄞人在宋時聚族千指同居合食者五世號義門薛氏公於元至治癸亥以書經登賢書分教平江之常熟後遷杭州教授攝沅江縣事既而引年致仕載嘉靖寧波府志

四明人鑑 卷一

七四明叢書  
約園刊本

袁公諱士元字彥章性至孝父背患疽吮之立瘡以茂  
才授縣學教諭調鄞山書院山長尋爲平江路學教諭  
擢翰林國史館檢閱官不赴築城西別墅種菊數百本  
自號菊村學者所著林外集七卷危太樸爲之序稱其  
思致高遠云載元詩選

陳公諱經字子經奉化人嘗作通鑑續編書趙匡胤廢  
其主爲鄭王一日公晝寢夢至一所類王者居有人入  
報陳先生至矣其中坐者衣黃袍起坐待之曰朕何負  
於卿乃比朕於篡耶公心知爲宋祖對曰陛下欲臣死  
卽死耳史貴直筆不可易也載硯雲甲編

四明人鑑 卷二

九四明叢書

約園刊本

俞公諱述祖字紹芳象山由翰林書寫考滿調廣東  
元帥府都事入爲國史院編修已而出爲沔陽府推官  
至正十二年蕪黃賊迫州境公民兵守綠水江并力捍  
禦之兵力不支城陷爲賊所執械至其僞主徐壽輝所  
誘之使降公罵不輟壽輝怒支解之有子方五歲亦死  
事聞贈奉訓大夫禮部郎中象山縣男載元史



汪公諱繪世字漢文洪武初授太平府同知推誠馭下  
有三虎踞林白晝飼人公爲文呪之虎卽遁去陞湖廣  
按察司副使載鄞縣志

錢公諱唐字惟明象山元末隱山谷中明太祖登極  
公年將六十應詔赴京敷陳王道裁正禮樂超拜刑部  
尚書洪武二年詔孔子釋奠止行曲阜天下不必通祀  
公上言孔子垂教萬世天下共遵其教故天下得通祀  
報本之禮不可廢令遂止三年上讀孟子至草莽寇讎  
之說謂非臣子所宜言欲去配享詔敢陳者罪以不敬  
且命金吾射之公獨抗疏入諫輿櫬自隨袒胸當箭曰  
臣得爲孟軻死死有餘榮上見其誠懇命醫療其箭瘡  
於是孟子配享得不廢載象山縣志

陳先生諱思禮四明儒家甫七歲父蚤世母石氏鞠育  
之母歿先生創鉅痛深欲隨母死親戚力慰解之乃止  
年二十四親友勸之娶先生掩耳不答眾迫之曰娶妻  
以爲養也親歿何以娶爲旣而親友據義責之不得已  
乃從及期合登危坐誦蓼莪之篇凡七晝夜不輟哀慟  
路人後以貢至京師入太學爲上舍朝士咸稱之載徐  
一夔書宋學士所書陳思禮孝事

王先生諱國祚定海紫微莊浦東人洪武二十年信國公湯和經略東南以宋元遺賢鉅族多隱海島窮僻之鄉心竊忌之乘蘭秀山葉希載王子賢之亂奏請遣徙懸海四十六山居民兵火慘毒無所控告先生語同難者曰丈夫弗効尺寸力爲桑梓謀奚以爲人遂兼程赴金陵見高帝力陳翁洲不可徙之狀民兵與官兵交足之法帝允奏賞勞遣歸先生歸傳諭鄉人之已徙遠近者皆復舊里巡檢官以部檄未降罪之復禽之至金陵帝再勞而歸之復翁洲之事乃定翁洲人德之顏先生

之堂曰復翁堂稱之曰復翁先生以此地藉翁而復也  
載定海縣志參傲居集

四明人鑑 卷二

十四 四明叢書  
約園刊本

張公諱信字誠甫定海人洪武二十七年進士第一人授翰林院修撰遷侍講拾遺補闕直聲震朝寧三十年會試上命學士劉三吾爲考試官所取盡江浙閩人中原西北無預者謗議騰起上怒命儒臣覆試公與六七翰林官受命閱卷或曰上方震怒宜少貶以承上意公不可仍以三吾所取中式卷進上益怒謂此屬皆胡藍黨公坐棄市人咸惜之天啓閒辭文介公啓學使祀公鄉賢祠詳載鎮海縣志

易公諱紹宗象山人以戰功授錢倉所千戶洪武二十四年倭賊登劫湯巽潘家礪公遂大書于壁曰設將禦敵設軍衛民縱敵不忠棄民不仁不忠不仁何以爲臣書畢命妻李氏具牲酒生奠之與決而出乃密令游兵從閒道焚賊舟賊驚還救公率所部直前格殺賊無算追擊至海岸淖深馬陷賊回攻之猶手刃數十賊遂死焉諭祭葬勒碑旌之載嘉靖寧波府志

四明人鑑卷二

七 四明叢書

約園刊本

陳公諱睦原籍定遠人後家定海父仲和從明太祖起  
兵屢著戰功被傷成疾未及授官而卒公嗣世太祖念  
父子積久勳勞授世襲正千戶運糧海上建文二年燕  
兵起命李景隆出征公隸前軍次德州與燕兵戰於夾  
河奮勇直前斬殺數人會景隆後隊退走遂敗績公爲  
流矢所中死載寧波府志



張公諱安國定海人建文朝爲工部郎壬午燕兵迫京師公謂妻賈曰余職卑不能帥師應敵又不能屈膝以事人柰何乃乘舟入太湖聞金陵陷大慟曰食人之祿而偷生於新主之地恥莫大焉遂與其妻鑿舟自沈載寧波府志

梁公諱田玉定海人仕刑部郎中其時梁氏父子兄弟  
八人同仕於朝燕兵入金陵公與御史葉希賢俱髡髮  
爲僧及建文帝出亡往來蕭寺公時奉衣食後不知所  
終松陽人王詔遊治平寺聞藏上嘍嘍有聲異之令人  
緣藏登絕頂得書一卷載建文時出亡臣僚二十餘人  
事紙毀泐字多斷爛銓錄其可識者得田玉及郭良梁  
中節梁良用宋和郭節何洲梁良玉何申凡九人人僅  
數言因各以詩係之或曰梁氏父子兄弟爲舟師投水  
死者五人載鎮海縣志王詔忠賢奇祕錄參續藏書

四明人鑑 卷二

千四明叢書  
約園刊本

李公諱山如字伯偉永樂閒兵部郎中致仕歷官四十餘年清苦一節非奉母不御酒肉環堵數椽躬任杵臼之勞人稱擣穀郎中詔歲給月米五石及卒有司襄葬事焉載鄞縣志

楊先生諱範字九疇鄞人踐履誠確雖燕居恆盛服端坐讀書至夜分不懈教授里中視世之毀譽榮辱蔑如也永樂中有巫稱龍神道人禍福如響家趨戶迎官不能禁先生作文喻之弗止躬往見巫掉其首匍匐於地時擁巫羅拜者百數十人皆驚悟散去郡守鄭珞邑令張鐸咸賓致以訪政事初號棲芸晚年更號思誠叟載嘉靖寧波府志

四明人鑑卷二

三  
四明叢書  
約圖刊本

萬公諱文寧波府衛指揮以永樂十五年率舟師逐倭  
寇戰於定海桃渚大捷明年下哨象山之鋸門昏夜見  
雙燈遠至以爲寇也遽弩落其一炬黑風應弦而起一  
軍盡覆乃知其爲龍也公時年二十有二載鮎埼亭集

宋公諱琰字廷珪奉化人永樂乙未進士選庶吉士宣  
德初遷禮部主事正統九年遷河南布政司右參政時  
十旬不雨蝗大出公卽日往按齋嚴致禱有鶯數十羣  
徹空下食蝗越明日大雨官吏士民交相欣拊景泰四  
年轉太僕寺卿尋遷兵部右侍郎益勵忠勤士林推重  
載獻徵錄

四明人鑑 卷二

三四四明叢書

約園刊本

蔡公諱錫字廷予鄞人永樂癸卯舉人授六科給事中  
彈劾不避權貴知泉州府奏除洛陽東山大橋三鎮戍  
兵公私便之時洛陽橋圯發古石有文云石頭腐爛蔡  
公再來橋故宋蔡襄建而公適以守至遂重修民立祠  
配享端明陞山東副使歷大理寺卿巡撫湖廣設法賑  
饑全活數萬家尋乞歸載分省人物考

王先生諱汝林奉化連山鄉人性好施凡貧病過門者接之不厭遠近慕其名陸司寇瑜時爲邑庠生貧不自存往詣之先生時浴於溪陸以謁告遽起而入攝衣延之上坐盛爲之禮次日卽遣人濟其家不以告也比留連旬日陸乃自言其情曰竊慕公高義幸而款我其如家累何先生出謝啓示之陸起拜曰不虞君之惠我若此辭歸明日先生盛張具觴而送之凡寒暑之衣畢具且贈之金載兩浙名賢錄



張公諱瑋字廷玉慈溪人正統己未進士爲刑部主事能洞悉疑案決淹獄尙書金濂性聰察頗輕屬吏公抱案詣前從容舉所鞫囚數名罪矢口如流不煩省閱濂改容禮焉扈蹕土木死初也先入寇權璫王振主親征議公首率同曹疏諫不報已而詔選從征官公慷慨請行師次居庸時倉卒出兵軍無紀律公策其必敗連疏請還蹕爲振所阻及土木而兵潰英宗北狩同列多散走公拔佩刀直前追駕厲聲曰臣與陛下俱出誓不獨入僕陳貴牽衣泣公絕裾而馳曰吾不歸矣遂見殺英

宗復辟諭祭於狼山晉階承德郎廕其子圭歷官太原  
同知載寧波府志參湯斌傳

四明人鑑 卷二

毛  
四明叢書  
約圖刊本

俞先生諱敏德字謙鳴鎮海人父彥華赴京師聽選至高郵病卒母唐氏在家相繼卒先生甫九歲日拊棺號泣聞於邑令令爲之給費貸以夫船始得扶柩以歸及長不樂仕進於三山構屋環植以竹哀慕不替因名其堂曰永思有司屢以材薦以祿不逮親而辭作盤溪四詠以見志人稱竹所先生卒年百有五載鎮海乾隆志

夏孝子諱道昌居鄞之月湖以漁爲業幼孤聽母教惟  
謹旣長而漁日所得魚擇巨者以奉母母得瘁疾日在  
申大作非沸湯沃之弗止孝子出必申歸以供湯沐無  
後時一日漁於新莊之河得巨鱗里人厚與之直堅弗  
與問其故答曰歸以奉母由是名著及母卒哀毀如不  
欲生會有詔錫民孝弟力田者粟帛有差孝子力辭弗  
受載兩浙名賢錄

嚴公諱端字克正號謙齋以進士累遷南軍駕員外郎  
爲積忤所中解組歸性至孝母年六十奉養歷卅餘年  
母年百四歲朝夕不離左右母齒豁不能餐公手屑良  
米煮粥操匕箸以進母有所欲輟力致之少疾卽束帶  
至旦身嘗五藥至母體復始就寢及居喪哀毀彌至其  
學貫串百氏著有謙齋集載甬上耆舊傳

沃公諱頰字文淵鎮海縣蘆江人成化二年成進士官御史奉檄清理福建戎政巡按江西發奸摘伏人稱神明吉安知府貪黠厲民公首劾之乃爲權貴所銜誣以庭辱守令飢餓憲典左遷內鄉知縣接壤鄖陽鄖陽豪右多侵內鄉地民多流移公至繩豪右以法歸侵地民復還及秋令各輸粟備賑不三年而儲積至十餘萬石民甚利賴之尤究心學校培植士子遷知荊州奏罷貪吏削除附冒之糧數十萬石以備兵餉弘治三年丁外艱尙書交章薦其才公不欲再仕退老於家日惟觴詠

自適非公事不迹城府載鎮海縣志

四明人鑑 卷二

三  
四明叢書  
約園刊本

賀公諱欽字克恭世家定海父孟員以戎籍綠遼之義州衛少穎敏習舉子業輒鄙之曰爲學止於是耶取近思錄讀之有省成化二年成進士授戶科給事中因亢早上章極諫遊樂復以言官曠職召災自劾求退會陳獻章被徵來京師聽其論學卽日上疏解官去執弟子禮事獻章旣別肖獻章像歸構一室懸之朝夕瞻視其學專讀五經四書小學校於反身實踐終日閉門靜坐主敬以收放心有來學者輒解而從遊者甚眾弘治改元閣臣薦起爲陝西右參議適母死上書辭凡萬言正



德四年太監劉瑾括遼東田東人震恐思亂義州以守  
臣貪殘變先發聚眾劫掠顧相戒曰毋入東街驚賀黃  
門公聞之往諭乃散去晚年更好易大臣引薦終不起  
少嘗隱居醫無閭山因以醫閭自號人遂稱爲醫閭先  
生卒年七十四諡恭定載鎮海縣志

姚公諱鎮字英之慈谿人弘治癸丑進士嘉靖五年遷  
右都御史提督兩廣軍務兼巡撫四川土官岑猛謀不  
軌公令都指揮沈希儀結猛父岑璋共圖猛調兵進討  
猛子邦彥以兵守隘官軍攻破之斬邦彥猛奔永順璋  
醜殺之斬首以獻進左都御史加太子太保公請改設  
流官陳善後七事制可乃命參將張經鎮其地猛黨盧  
蘇王受詐言猛不死借交阯兵且至夷民信之蘇等薄  
城經走城陷受亦攻入思恩府會起王守仁督兩廣軍  
帝入張璉等言落公職閒住十三年三邊闕總制大學

士費宏薦公帝命以兵部尙書總制三邊軍務公辭家  
居數年卒載獻徵錄

四明人鑑 卷二

三  
吳四明叢書  
約園刊本

張公諱邦奇字常甫鄞人年十五著反騷又著易解登弘治乙丑進士改庶吉士授檢討出爲湖廣提學副使下令曰學不師孔顏行不希曾閔卽才如雄喪吾且斥之至今楚人言善教者必曰張提學云歷遷春坊庶子國子祭酒至南兵部尙書卒贈太子太保諡文定公之學以人性爲無不善以聖賢爲必可師日繹洙泗濂洛之旨危坐一榻目無流視耳無傾聽口無誕語視其身納之矩矱兢兢焉初在翰林時嘗作觀頤錄在國子時作昭事錄平生所著有五經說大學中庸傳觀光紓玉

樓環碧堂養心亭靡悔軒四友亭諸集載嘉靖寧波府志

四明人鑑卷二

三  
四明叢書  
約園刊本

四明人錄 卷二

四明叢書  
約圖刊本

王公諱相字懋賢資性絕人復嗜學授徒高山中夜誦  
不輟飢卽拾蹲鴟火而啗之成進士授庶吉士尋遷編  
修以議大禮逮詔獄死杖下公性篤孝爲文原本六經  
而才思橫溢時馳驟莊列閒學者稱介塘先生載甬上  
耆舊傳

劉公諱鼎字伯銘定海衛指揮僉事狀貌雄偉擢把總備倭正德初江西姚源寇起督勦大臣檄公爲偏裨公奉檄呼家人語曰謹守室廬今日受命卽捐身報國時也出門簡徒而行竟奏克捷陞授浙江都指揮僉事時劉瑾用事繼以宸濠陰謀內使充斥道上頤使武弁而奸徒復爲宸濠遙應公密與臺司協謀設備擒之嘉靖初總督備倭年且七十躬行邊徼簡閱徒旅謂其屬曰祖宗爲慮深遠立法周至吾輩恪守之而已尋致仕家居任邊事者多所咨訪年近八十而終載萬曆定海縣志

史公諱元中號鹿泉鄞人少任俠善射舉謁選靖江學  
教諭遷知魚臺縣盜有簡端者善運稍馳馬出沒莫可  
蹤跡公廉得其親信授以計縛簡臥庭下張目曰吾左  
手持稍右短兵橫行千里間今乃爲書生掄取耶公笑  
曰汝輕書生耶卽起著短衣持其所用稍運之左右迴  
旋如舞匹練忽舂然稍斷爲三擲示簡曰汝稍豈足用  
耶簡叩頭稱死離魚臺三十里有獨山大盜劉儀久嘯  
聚其中開府曾銑議進勦以公爲前鋒公知有謀者在  
軍內乃命植一竿百步外手挾矢誓曰若一舉滅賊當



三矢中此竿三發三中卽察得謀者三人賜以酒食笑  
謂曰汝來觀吾射耶謀者股栗盡吐賊虛實及所入徑  
道公立提兵襲其寨擒儀還銃手書平寇第一功相贈  
銃總制三邊奏復河套檄公同事不果行後入覲值銃  
爲相嵩所害喟然曰事尙可爲耶卽日掛冠歸里時年  
四十二家居四十年卒載甬上耆舊傳

范公諱欽字堯卿鄞人嘉靖進士知隨州陞工部員外  
郎時武定侯郭勳勢張甚公以事忤之譖於上杖之出  
知袁州府嚴世蕃欲取宣化公字公不可累任副都御  
史巡撫南贛汀漳諸郡擒劇寇李之虎賜金綺又擒大  
盜馮天爵陞兵部右侍郎歸卒公博雅好古聚書天一  
閣至數萬卷多祕本爲四明藏書家第一載舊浙江通

志

許孝子諱瓏字廷璧鄞人少孤依其母無頃刻離一日  
母擲竹誤中暈仆地母急抱持泣孝子稍蘇卽睜目笑  
曰兒故嚇非真暈也長竭力奉養凡母欲以致平居恆  
言聖門以色養爲難此不假外求不費貨貨直易易耳  
至今茅山之陽稱純孝焉子元祥成進士載嘉靖寧波  
府志

戴公諱鰲字時化別字少山家鄞之桃源舉嘉靖乙未  
進士與人無親疏輒惻惻見情素而恤災救患尤所孜  
孜會試時一同舟者得痢疾友各棄去公獨周旋其閒  
湯藥含斂靡不盡力南太僕陳公侃入覲與遊雲龍山  
暴殂出己資爲之治斂載獻徵錄公以水部主事治徐  
州載鄞縣志

葉公諱應乾字際清慈谿人嘉靖進士授高安縣累遷  
四川按察副使備兵建昌居邛焚閒地險惡六衛衛長  
戎政久不修公登壇下令比什伍而訓練之懸賞格以  
勵勇者於是人人超距就節制會土酋安忠死忠妻鳳  
氏自請襲官而從弟信謀攘之遂橫決自恣月朔以戎  
服見擁甲士自隨公使人陰布部兵於外而令材官有  
力者尾之入公臨陞立呼信跪堂下數以諸不法事叱  
令縛之信懾不敢出氣遂就縛而甲士在外者見所布  
部兵按劍立如堵牆皆奉首竄卽檄鳳氏兵擊其餘黨

殲巨酋三百人境內始定而滇南鳳繼祖亂公計繼祖聚於會川會川者建昌所屬衛也先遣兵守金沙江以扼繼祖之至已而繼祖果以萬眾渡金沙遂合滇師夾擊之公躬擐甲胄冒矢石爲將士先遂破其軍繼祖隻身跳匿山中鳳氏故德公而其母爲繼祖所害每欲復仇公知之密召鳳氏至授以方略使圖之鳳氏使間其所親者爲內應而自以兵蹙之遂斬繼祖事平當論功而被劾落職歸載兩浙名賢錄

劉公諱隆字大昌世襲定海衛指揮使以強幹屢協總  
諸衛備倭海上寇起公平之後賊入康頭公腹中流矢  
見血益奮怒鏖戰卒破賊嘉靖壬子遷把總嘉興統舟  
師備乍敵當松江七圍賊歸公扼之焚沈賊舟後會破  
史家濱賊公又扼之沈賊舟敵浦外洋陞署都指揮守  
備溫處乙卯倭寇數百將薄瑞安縣公徑往殺賊十餘  
人賊遯去迴軍至田閒有數十賊伏莽中遽起擊公公  
不及備遂與尹千戶俱戰死載寧波府志

杜公諱槐字茂卿慈谿人值倭寇屢犯內地遂散家貲  
結饒勇值縣僉其父文明爲部長令團結保聚公傷父  
老以身任之寇薄觀海衛城公一呼而羣勇俱集直前  
斫賊衛遂得全賊又犯鳴鶴公率眾迎擊賊走餘姚東  
山公追之探有數寇飯空舍提刀赴之賊伏牆隅揮刃  
中石刃缺內賊盡出乃提廢刃當之自午至酉鏖戰不  
已戮其緋衣渠帥竟以飢疲力竭而死後賊見黑旗卽  
驚曰杜兵至矣其麾下士皆願從文明殺賊以復讎寇  
自黃巖犯寧海海道檄文明偕畢主簿統兵遮要遇寇



於楓嶺力不能支遂與主簿畢某俱死焉請於朝贈光祿寺署丞文明府經歷立祠有司歲時致祭載寧波府志

楊義士諱一居金家壩人年二十餘膂力絕人嘉靖甲寅倭賊數百登劫其壩義士持長矛倡於眾曰有能殺賊者從我少年從者十餘輩迎賊戰於海塗手殺數賊倭賊鳴角聚而擬之諸少年潰義士獨力戰刺二倭而斃賊忿恨解其屍屠其腸而懸之鄉人高其義立祠祀焉載嘉靖定海縣志

沈孝子諱良十賊犯鳴鶴鎮孝子時年七十餘尙有九十餘歲母賊至負母至五百里以力竭不能行息山谷舍中賊追至跪拜請死願貸其母賊見母子俱皤髮舍之而去憐母飢渴方圖飯賊又至舉刀欲斫其母孝子以身覆母號哭遂被殺母竟得全載籌海圖編

義士魏鏡慈谿人少有勇力善格鬪嘉靖乙卯倭寇至  
鳴鶴鄉邑令曹本率眾禦之兵敗鏡負令走賊追之踰  
杜湖嶺而南殺數賊賊斫傷鏡額死寇退令爲之泣葬  
作文祭之載天啓慈谿縣志

義士胡滾字克源有勇略倭寇翁洲梅家塾邑令宋繼祖募義兵往禦以滾爲長率眾出海寇立木柵繞以鹿角四圍皆汙田勢不可破滾奮勇爭先與鬪所部係烏合之眾見賊皆奔滾獨後殿賊突至乃手刃三人力竭遂爲所害繼祖聞之扼腕曰真義士也申於督撫旌其門弟沛當滾迫於賊時往救同歿於陣載鎮海縣志

壯士吳德四德六慈谿人倭經其廬驅其豢豕德四自  
田歸遇倭於門揮鋤中其腦仆地弟德六取倭刀追殺  
一魁遂以壯勇隸杜槐部每遇寇卽衝鋒奪旗以爲常  
海道知其名檄往攻舟山險寨德四直前斫賊渠於轅  
門寨內驚擾噪而出怯卒皆返旆走賊斫德四死德六  
奮呼獨前殺其殺兄者後兵不繼亦死賊渠被戕寨不  
能守卒爲官兵所破載兩浙名賢錄

葉七定海衛軍賊王直負金塘烈港穴爲寇大將俞大猷提舟師直入其港討擊火礮橫發勝負未分而舟忽掛賊纜櫓楫不能施賊眾方遑七徑取斧投水斫其纜連揮數斧纜斷而沈舟遂免後四日大猷破賊而定其穴以不得七屍爲憾厚恤其家爲招魂而葬之載兩浙名賢錄

王孝子諱伯化字子魚父歿哀毀如禮嘉靖丙辰倭入縣治士民倉皇出走孝子掖母出郭外同行者曰賊迫矣盍求活計孝子曰母活我活安用求爲頃之僕又告曰賊迫甚子母恐不相顧矣僕亦去孝子掖母以前母曰母子同死無益汝急去詰朝可收吾骸孝子號泣掖之如初望賊呼曰余饋汝金毋傷吾母賊揚刃向母孝子以身承之遂遇害賊見孝子死竟掠金不兵其母而去至隆慶壬午母以壽終載天啓慈谿縣志



蔡公諱啓元以良家子擊倭廣德累戰功授千夫長嘉  
靖三十八年官兵禦賊於奉化同行者俱錯愕不前公  
獨匹馬縱橫與賊逼賊駭散或走或伏公手格殺數人  
會天新雨馬行淖潦中不得出力盡矢空顧左右皆散  
去僅弟昆元與二三家僮不去公瞋目揮劔罵賊曰吾  
不啖汝肉非夫也死戰良久賊乘閒涉河繞其背刺之  
死踰時猶立馬上不墮有司具棺斂給貲歸其喪載嘉  
靖寧波府志

屠公諱本峻字田叔又字幽叟號漢阪拜辰州太守以  
寬仁治之辰人大悅在郡禁殺牛有唐生具牒言家貧  
畜一牛不幸猝死請鬻其肉以糊口公知其給也判以  
俸買牛葬之比牛至果生因命小吏養之及公解官深  
衣騎馬出門辰父老泣相送牽牛隨其後公屬吏善養  
牛終其年時人爲作辰陽留犢圖一時傳之公疏眉目  
廣頰而哆口望之若神仙載甬上耆舊傳

余公諱有丁字丙仲鄞人登嘉靖四十一年殿試第  
三人及第授翰林編修童時遊崑山求執經於歸震川  
之門震川屏不許至隆慶初公充會試同考手一卷曰  
是必歸先生文也失吾不收先生老公車矣及發卷果  
然海內文章爲之一變歷遷吏部左侍郎掌詹事府江  
陵新歿以禮部尙書兼大學士入閣辦事至太子太傅  
改建極殿卒於京邸賜祭葬諡文敏公素達生喜訪故  
鄉佳山水初以南學士乞假歸里買山東湖中起白鷗  
莊四方名士至相與遊湖山載肴觴攜絲竹唱詠傳一

時江左風流著有文敏公集十五卷載寧波府志參四  
明談助

四明人鑑 卷二

空

四明叢書  
約圖刊本

駱先生諱元象山人嘉靖末年島外漁人約六十餘偶  
爲疾風飄舟至金齒觸入內地守汛卒羣譁曰此可擒  
也遂縛之以獻主者時先生爲里老從旁力諍曰天道  
神明炯於白日奈何妄殺無辜詞色凜烈主者心動立  
釋之六十餘人搏頰而去載象山縣志

屠公諱隆字緯真一字長卿鄞人萬曆丁丑進士除潁  
上知縣調青浦陞禮部郎中公令青浦延接吳越閒名  
士青帘白舫縱浪柳浦閒以仙令自許在郎署益放情  
詩酒罷歸縱覽關塞遨遊吳越七閩閒嘯傲賦詩長篇  
短什信心矢口嘗戲命兩人對案分拈二題各賦百韻  
咄嗟之閒二章並就又與人對弈口誦詩文此誦彼書  
書不逮誦所傳由拳白榆采真南游諸集皆未曾起草  
之筆載寧波府志

李公諱環字宗復鎮海人弱冠補諸生膂力過人善騎射又能置丸竹筒中呵氣吹射飛雀如弋父興嘗誤中軍法公身爲周旋者數歲得解父卒公嗣世職乃棄儒業學韜符嘉隆閒試浙江武闈三中式上官以其材檄令督浙西水軍有功捷聞授獎賞有忌之者調守昌國遊仙寨復改舟山團練萬曆十一年中武會試進都指揮僉事掌衛篆陞湖廣靖州守備值土酋亂徵三楚兵合勦之身先士卒甲不解者三月卒平諸苗撫按交章上其功竟以積勞遽卒年四十四載鎮海縣志

辭公諱三才字仲儒鎮海人萬曆十四年進士授庶吉  
士改給事中數言事乞召還姜應麟諸人在垣七年例  
推京卿公獨毅然請外補參政守荆西荆守陵璫橫甚  
憾鍾祥令欲奏逮公力爲護持之觸稅監陳奉怒誣以  
撓稅幾得危禍遷本省布政使會楚宗人華樾等以假  
王事擊巡撫至斃勢洶洶公力爲解散亂定巡按以叛  
疏於朝公又力言諸宗罪在殺撫臣劫賈物耳非反也  
楚獄得不蔓尋移疾歸已卽家拜右副都御史巡撫宣  
府陞兵部右侍郎總督薊遼邊務凡可爲邊陲計者不



憚心力經營遂積勞成疾尋陞兵部尙書協理戎政三  
上疏乞身不允乃受事禁軍多虛冒內侍尤甚公銳意  
釐剔中人深銜之時中樞久虛公視事二十日盡疏八  
月寢閣案疾益劇遂卒於官贈太子太保賜祭葬諡恭  
敏詳載鎮海縣志

辭公諱三省字魯叔別字天谷萬曆二十九年成進士  
改庶吉士授檢討歷官至左庶子兼翰林院侍讀會兄  
三才卒請告歸天啓間卽家起小詹事至五年八月改  
吏部左侍郎會推閣臣因忤魏忠賢遂不獲與猶以公  
望重陞禮部尙書島帥毛文龍以邊功媚忠賢請宣捷  
告廟公力持不可又疏言皇極門功加恩太濫忠賢憾  
刺骨欲伺閒發之公自念不去禍且不測遂移疾乞歸  
屢上疏已刻下落職閒住崇禎改元起爲南京禮部尙  
書兼翰林學士協理詹事府辭不拜七年再起原官命

下卒已月餘贈太子太保謚文介詳載鎮海縣志

四明人鑑卷二

奕  
四明叢書  
約園刊本

戴公諱國柱字殿林善騎射游京師授徐鳳守備累功  
至參將會小袁營賊起闖大熾公分布方略大殲厥醜  
捷聞陞總兵官經理河南時山東闖賊直犯中州公提  
兵抵賊壘賊添生力孩兒軍孩兒軍者闖營中惡少年  
閔不畏死者也公血戰不支遂被害載慈谿縣志

陸先生諱大漳字德學郵人少時館烏鎮一夕忽聞扣門聲啓視則一姣好幼婦也先生斥之閉門挑燈危坐達旦向主人言適得家信須急歸遂辭去有范奎者得館資十餘金歲暮與先生同舟返將分途范遺其金而去先生於舟底拾得之亟趣僕追范范願分以相酬力辭不受載郵縣志

莫先生諱文煥字象明象山縣學生世居昌國衛聞明  
亡痛哭具衣冠徧別親族遂拱坐海邊沙土上潮至隨  
水湧去越數日屍復隨潮而轉顏色不變人驚神異載  
象山縣志

華公諱夏字吉甫別字嘿農其先定海人遷於鄞以恩  
貢入太學乙酉六月浙東兵起首謀舉事奉錢肅樂書  
說定海總兵王之仁反正魯王監國以布衣從軍入肅  
樂幕七月江上潰會肅樂航海入閩連下三十餘城丁  
亥乞師翁洲總兵黃斌卿不應適慈谿大俠以侍郎馮  
京第海上往復書洩牽連捕之入獄營救得出謁御史  
李長祥於東山爲其乞師翁洲斌卿強許終無出師意  
復令楊文琦益勸斌卿約以十一月四日集諸路兵始  
諾之而謝三賓告變得反聞之力賺取公所貽大蘭帛

書事洩不得發巡按捕公大陳刑具究其黨與公曰心腹腎腸肝膽吾同謀也及問帛書所載諸人皆言其預知再拷之則大呼曰太祖高皇帝造謀烈皇帝主兵安皇帝司餉其餘甲申乙酉殉節諸忠范景文史可法而下皆同謀也三拷之終不屈在獄中鼓琴賦詩如平日自稱過宜居士戊子五月正命以終魯王還軍贈檢討門人私謚毅烈詳載鎮海縣志



明人鑑 卷二

書 四明叢書

一 約園刊本

錢公諱肅樂字虞孫又字希聲學者稱止亭先生鄞縣  
芍藥汜人九歲能文少時嘗夢日墮其手以手扶之稍  
稍而上卒不能支日漸小漸晦隨臂而下登崇禎丁丑  
進士選員外郎浙江內附公起兵於鄞迎請魯王監國  
累贈兵部尚書兼東閣大學士連江失守公遂絕食卒  
于琅江贈太保吏部尚書諡忠介詳載鮎埼亭集

張公諱煌言字玄箸號蒼水鄞縣西北鄉人舉崇禎壬午鄉試當弘光出走南都既覆公家居聞之慷慨而起與同里刑部郎錢公肅樂立魯王於紹興思爲劃江以守大兵東渡江干失守公偕張名振奉王退居翁洲且招義兵屯四明山遙與鄭延平相呼應尋大舉入內江圖京口薄金陵軍聲所播幾搖動東南半壁閩師敗績公出入萬險僅以身免歷重險保彈丸冀爲匡山之殘局而終以勢去不能挽回魯王薨於臺公乃散部曲遁入南田爲提帥張杰購獲執赴杭州防守卒史丙者夜

坐船頭唱蘇子卿牧羊歌公披衣起扣舷而和之至守  
獄中終日南面坐諭降不從正命以死遺民數人覓其  
骸骨葬南屏山荔支峯下公舉義凡十九年魯王朝賜  
進士晉翰林院編修加兵部右侍郎權兵部左侍郎兼  
翰林學士乾隆閒高宗純皇帝以勝國諸忠臣繫於綱  
常名教賜諡忠烈公著有冰檠集奇零草采薇吟北征  
錄詳載鮎埇亭集

周先生諱西字方人居蘆江性耿介抗節自高事母孝  
愉色婉容數十年如一日時際亂離所遇輒遭殘戮嘗  
負母避難中途遇盜盜聞先生名脅之去不從以刃折  
先生右臂巨指斷而復續卒救其母歸中年後謝去世  
事以山水詩歌自樂暮年教授生徒以老其身嘗築勁  
草亭自號勁草居士所著有春秋傳注勁草亭集藏於  
家藏鎮海縣志

項先生諱宣字宣之博學好古少負異才值明亡遂不  
赴試黃冠道袍作羽客裝妻歿亦不再娶與諸隱者以  
詩相倡和文亦古奧幽峭尤工於草書敔側斜正點畫  
俱有勁致性嗜酒求字者延之家飲酣置筆硯別室見  
必疾書罄紙而後已嘗爲海盜陳壽所掠令寫帥字於  
大纛先生不從或爲之再三跪請乃命碎墨盞中以一  
足着草履濃濡墨汁笑而書之賊大悅贈以百金送之  
歸及登岸投金海中卒年七十餘載鎮海縣志徐文彬  
撰傳

# 列女

四明錄  
卷三

四明錄  
約園刊本

錚錚其烈皎皎  
其節性操松筠  
志矢冰雪巾幘  
之賢閨壺之傑  
圖畫儀頌千秋  
凜冽

夫人葉氏慈溪人歸鄞之史簡爲縣從事尉受賕杖平民簡獨憫之以杖首雜朱殷以進初舉杖血流於尻尉怒以杖平民者杖之歸數日死氏年二十五有娠後得男曰詔鄰保咸曰是襁褓兒寧可恃耶誓不聽晝夜紡績俾其子從師讀書爲善士晚歲生產益裕養孤女俾有歸年八十六以終凡十八封至冀國夫人載延祐四

明志

童氏八娜鄞之通遠鄉建輿人虎銜其大母女手拽虎尾祈以身代虎爲釋其大母銜女以去時林栗侍親官其地嘗目覩之已而爲守以聞於朝祠祀之載宋史



劉氏名宜字淑靜鄞人歸崇邱樂壽孫三年壽孫渡江  
死同溺者多不能得屍氏生男甫周歲抱之沿流哭而  
求屍屍忽自浮得收葬焉時年二十九舅姑已先歿撫  
孤勤苦克成家業至正間表其門太史危素有傳載成  
化四明志

四明人鑑 卷三

五四明叢書

約園刊本

金氏名汝安金良女父母多疾侍奉惟謹及笄里中大  
家爭求聘女曰父母老且病雖有兄弟馳驅門戶事朝  
夕乏供養奈何舍去自是絕葷茹蔬每夜焚香告天祈  
親壽後父母俱八十餘而歿女居喪六年遂不嫁史官  
危素爲之贊載嘉靖浙江通志

四明人鑑卷三

六四明叢書

約園刊本

金氏四明程徐妻也京城旣破謂其女曰汝父出捍城  
我三品命婦汝儒家女又進士妻不可受辱抱二歲子  
及女赴井死載元史

萬氏義姑名義頴字祖心寧波衛指揮僉事萬鍾女幼  
貞靜喜讀書兩兄武文皆襲職戰死旁無期功之親繼  
母曹氏兩嫂陳氏吳氏皆盛年孀居吳遺腹僅六月姑  
旦暮拜天哭告曰萬氏絕矣願天賜一男續忠臣後我  
矢不嫁共撫之已果生一男曰全姑喜曰萬氏有後矣  
乃與諸嫠共守名閥來聘皆謝絕之訓全讀書底成立  
全嗣職傳子禧孫椿皆奉姑訓惟謹姑年七十餘卒姑  
之祖斌及父兄皆死王事母及二嫂守貞數十年姑更  
以義著鄉人重之稱爲四忠三節一義之門載明列女傳

四明人鑑 卷三

八四明叢書  
約園刊本

楊氏守貞楊孟輝女也甫八歲許字俞氏伯子頃之伯  
子死俞氏請以仲繼楊父母許之女聞泣拜母前曰大  
人許兒爲俞伯婦疇知有仲也願大人以子畜之雖白  
首不悔父母憐而許之遂臥起一小閤不與家人相接  
至六十四而卒載兩浙名賢錄

張氏名如涓年二十一歸包文助甫期生子旬未及晬而文助夭夫之女弟誘以改志不聽夜爲鬼祟以怖之張知其僞覆鐙以覘俟崇發卽啓鐙女弟慚而退自是勤紡績養姑育子卒振包氏之宗載兩浙名賢錄

孺人周氏字如珍年十六歸余暄爲妻成婚六日暄卒  
孺人翦髮自誓族有難其守者語洩孺人恐中變乃自  
經幾死者三朝夕號泣一樓力勤紡績以姪謙德爲嗣  
謙德子本中正德辛未榜眼時孺人年九十張樂設宴  
孺人謂悖生平苦志屏之九十七而卒婢阿秀及笄將  
嫁之秀堅志悲哀願事主母以終身年六十先卒王文  
成題其墓曰節感孺人載寧波府志

胡氏李珂妻年十八歸李閱七年而珂死遺男女各一  
苦守室中誓不踰閫鄰火作珂兄珮往救之曰阿姆來  
吾乃出珮使妻陳往胡以七歲男自牖付之燭曰幸善  
視之陳曰孀將何如給之曰取少首飾卽出陳去胡卽  
纍衣箱塞戶抱三歲女端坐火中死載明列女傳



楊氏忻玉妻年十九玉病疽楊吮之後死楊痛哭亦絕  
三日家人具殮乃蘇猶噫噫作哭聲遂斷髮誓死無他  
志玉嗜鯉每忌日必設一年偶值河枯無從覓楊悲慟  
不已忽一漁父持鯉至以一金得之祭畢食胙得原金  
於魚腹中大異之以爲哀感所致載兩浙名賢錄

潘氏李郭翁妻繼姑王氏每以非禮加之氏委曲承順  
王後病痿氏事湯藥抱持雖中裙廁踰必躬滌不懈後  
又事繼姑陳無異事王時疫大作舅與姑相繼死氏年  
二十九二子尙幼歲饑或勸其鬻書自給氏曰李氏累  
世所積以貽子孫者惟此耳忍輕棄耶乃織作以養姑  
教子後被旌載嘉靖寧波府志

林氏李八妻八故山農傭乞生子性三甫週而八死林  
年二十八擗踊哭泣若不能生既葬或說之改醮林曰  
生爲李氏婦死爲李氏鬼耳已而性三長娶婦邱氏舉  
一孫而性三死邱他適林抱育遺孤紡績以自給未嘗  
有幾微愁苦見於顏面人尤難之載嘉靖寧波府志

倪氏定海人適郡陳襄卒氏年三十無子家貧甚力女紅以養姑人有慕其姿者遣媒白姑氏煎沸湯自漬其面左目爆出又以煙煤塗傷處遂成癩惡狀見者驚走不敢復言歷二十年姑卒氏哀慟不食死載明列女傳

四明人鑑 卷三

天

四明叢書  
約圖刊本

胡氏許元忱妻元忱病疫死氏才二十三未幾夫兄亦  
疫死妯遽改適里人妍氏色競謀於許之強暴者求偶  
氏有期矣氏見逼卽毀面截鬢髮斷左手三指血淋漓  
誓以必死羣暴皆驚散去族尊姑妯皆抱持之氏大  
慟因立應後者氏督之力田益身自勞苦不浣不櫛故  
汗穢以自廢極力畢夫葬及娶婦纔潔布素年七十餘  
卒載兩浙名賢錄

王氏夏冕妻年二十三而寡遺孤二人俱在襁褓姑老  
齒落氏每晨起先以其乳乳姑二雛呱呱勿顧也嘉靖  
丙辰倭寇至氏負姑入山披荆棘破肌膚賴以全比姑  
卒悉營喪葬之事力瘁而卒載兩浙名賢錄及鄞縣志

戴氏許字方世顯甫納采而世顯死女痛哭欲奔喪父  
母有難色女曰往弔卽隨輿歸矣許之至門遂居苫次  
服衰經父母兄弟欲一面不可得守志終身載寧波府  
志

王氏許配吳姓寧俗舅姑有病迎婦於門謂之衝喜吳母病欲迎約晨往夕歸女適病瘖以次女代往吳竟留婚父母曰當爲汝再擇佳壻女堅矢不復嫁遂以處子終其身載舊定海縣志



方氏陳尙友妻能詩尙友卒遺孤甫三月有強易其志者乃吟一絕云繡幕絲牽一載紅鏡分鸞影夢魂通幾回欲就松筠賦羞見兒童誦凱風議遂寢載舊浙江通志

周氏金玫妻年十七適金期年而寡舉一子姑病不起  
醫禱無效夜夢神語曰爾一指可愈姑疾遂斷指煮汁  
進曰藥也姑啜之得強健如常有司月給粟帛旌其門  
載舊定海縣志

余有舊友虞君譜薰生平無別好惟善畫余屢造其廬以求之一日作羅浮山名圖以贈余余展閱之餘頓消俗慮可知尺幅之中不獨畫者可以消遣卽見者亦足以悅性情也試問畫法曰此李思訓所謂小斧劈皴山水一道諸名家各有所長如吳道子稱百代畫聖貞觀中閻氏昆季而善寫凌煙閣功臣圖像以及登瀛圖漁樵耕讀張僧繇畫龍點睛飛騰陸探微善作古今聖賢大像顧虎頭下筆如春蠶食葉小李將軍趙幹趙白駒伯肅馬遠夏圭李唐劉松年等諸家皆從思訓一派也

四明人鑑 跋

一

四明藏書  
約圖刊本

如張平山吳小僊戴文進張鳳翼用筆古厚氣運天成皆北派之後也其荆浩關仝董李皆從王右丞一派如王晉卿米氏父子乃從僧巨然一派卽文徵明沈石田唐子畏呂紀亦摹巨然之法欲得山水入門必先親歷寶境博覽古今史籍然則胸中有邱壑之氣腹中有經史之意意在筆先自然山有起伏水有源流徑有出入屋有見隱樹有層疊勢有凌空夫用筆發勢大而收勢小一頓一跌起伏玲瓏遠近濃淡無形有神人莫測其機巧者真佳作也蓋作畫之道先知潑墨惜墨二法惟

最不易者人物人乃天地至靈有富貴貧賤之分劍俠  
釋仙之別宜先知其本源品格性情以意達其容狀也  
如士女又當別論宜摹其意態度其氣質舉止行動是  
有定理如衣揭一道富貴宜剛柔相濟劍俠仙道之類  
獨取剛奇美人宜柔軼鯁寡孤獨之眾宜斷續下筆須  
有疏密順逆之勢也所謂龍躍天門蛟滾大海是也但  
補景一道局宜大置宜整氣宜運形之不足意之有餘  
起筆速而收筆遲滿中宜空空中宜滿用色宜淡淡中  
而豔豔而靜靜而清方能入妙花鳥之要宜分四時盛  
衰鳥之嘴爪猶人之手足花之枝葉猶鳥之嘴爪也兼  
而言之山水人物花鳥亭臺須以筆致高超局度古峭  
此謂神品逸品不外乎是乃畫法之正宗也余聽其議  
論井井不覺其心曠意遠而懽然自得朋輩中如虞君  
者實余所欽佩也夫故卽其所論以供同好者共鑒之  
壬辰仲秋京口劉椿書於海上

吾郡寧波古稱明州又曰四明自漢至明忠臣義士孝子賢孫節婦烈女不可勝數豈但百餘圖耳余特將四明府志中有可稽考者而略繪之以表先賢卽以示後學也起自庚辰之春吾友劉君午亭欣然與余同志迄今十有三年矣隨時勉塗計有百三十三頁又蒙諸君題贊彙集成冊標其目曰四明忠孝節義傳圖想關心世道者諒不爲余之工拙觀也壬辰之秋譜薰虞琴跋

四明叢書

四明叢書  
約園刊本